



Inatsisartunut ilaasortaq,  
Jens Napātōk  
Maani/

**Qilalukkat qaortat qernertallu kiisalu nannut pillugit § 37 naapertorlugu  
apeqqummut nr. 080-mut akissuteqaat**

Ulloq: 11-06-2020  
Suliap normua: 2020 - 9177  
All. nr. 13862180

Postboks 269  
3900 Nuuk  
Oqarasuaat (+299) 34 50 00  
Fax (+299) 34 63 55  
E-mail: apn@nanoq.gl  
www.naalakkersuisut.gl

Inatsisartut suleriaasianni § 37, imm. 1 naapertorlugu qilalukkat qaortat qernertallu kiisalu Kitaani Tunumilu pisassat amerlineqarsinnaanerit pillugit Naalakkersuisunut apeqqummik saqqummiussaqaarputit. Apeqqutit suliaasaqarfigisannit akineqartussanngorlugit innersuunneqaarput.

§ 37 imm. 1 apeqqutit nassiunneqartut naapertorlugit kalaallisuuani qilalukkat qaortat qernertallu pineqarmata qallunaatuuanili taamaallaat qernertat pineqarmata, APNN-ip apeqqutit kalaallisut allassimasut aallaavigalugit akissuteqarnissaq toqqarsimavaaa. Apeqqummut 5-imut tunngatillugu kalaallisuuani qallunaatuuanilu apeqqut marloqiusamik paasineqarsinnaammatt apeqqutip kalaallisut allassimanera naapertorlugu akineqarnissaa APNN-imit toqqarneqarpoq.

1. *Qilalugartassanut avannaani tunumilu tamakkerneqarsimalereerput, immikkut ittumik pisassiisoqarnissaanik Naalakkersuisut pilersaaruteqarpat?*

Akissut 1)

Naalakkersuisut ulloq 11. Juni 2020 aalajangiipput Aqutsiveqarfik Tasiilaq 8-nik immikkut qilalukkanik qernertanik pisassiissuteqarniarlutik. Immikkut pisassiissutigineqartut 8-t taamaallaat piniyaqatigiinnermi pisarineqassapput, kiisalu inuussutissarsiutigalugu piniartut apriliip naanerani 2020-imi pisaqarsimanngitsut salliunneqassasut. Pisassiissutit tassaapput qilalugaqatigiiaaniit qilalukkat qassit qilalugartassiissutigineqassanersut naatsorsuutaat, qilalugaqatigiit amerlassusaat attatiinnarneqassappat. Pisat amerlaneruppata, qilalugaqatigiit ikilisinnaaneranut ilippanaat minnerulissaaq. Ikinnermik pisaqartoqarpat qilalugaqatigiit amerlassutsiminnik amerlisinnaanissaat ilimanaateqarnerulissaaq. Taamaammatt pingaaruteqarpoq eqqumaffiginissaa, maanna pisaqarnerusoqarpat, siunissami pisassat ikinnerulernissaannut ilippanaat minneerarsuussammatt.

Naalakkersuisut maaip 18-anij 2020 aalajangerput aqutsiveqarfimmi Upernavimmi qaannamik pisarineqartussanik 14-inik qernertartasseeqqittoqassasooq. Taamaasillutik Aqutsiveqarfimmi Upernavimmi pisasseeqqinnerit naalakkersuinikkut aalajangerneqarsimasut ilanngullugit qilalukkat ukiumut pisassiissutaat 52-iulerlutik.

Qilalukkanik qaortanik pisasseeqqinnissaq Naalakkersuisunit pilersaarutaanngilaq, qilalukkat qaortat eqqarsaatigalugit ukiumut pisassiissutaasartut aqutsiveqarfinni tamani qaqtigut tamakkerneqartarmata.

Kitaani aqutsiveqarfinni tamani qilalukkat qaortat 2020-mi pisassiissutigineqartut suli tamakkerlutik pisarineqarsimangillat. Maannamut taamaallaat 72-it pisarineqarsimasutut nalunaarutigineqarsimapput. 2020-imi Kitaani tamarmi qilalukkat qaortat pisassiissutit tamakkerlutik 320-iupput.

- a) *Immikkut pisassiisoqaqqinnianngippat suna toqqammavilersuutaava? Ilisimatuussutsikkummi misissuinerit kingulliit takutitsimmata qilalukkat amerliartortut.*

Akissut 1a)

Piniarneq aallaaniarnerlu pillugit inatsisartut inatsisaat kiisalu Qilalukkanik qaortanik qernertanillu illersuineq piniarnerlu pillugit Namminersorlutik Oqartussat nalunaarutaat nr. 3, 27. januar 2017-imeersoq naapertorlugit piniagassanik atuineq piujuartitsinermik tunngaveqarluni ingerlanneqartartussaavoq, piniagassaqartuarnissaa aammalu piniarnermik inuussutissarsiutip ingerlaannarsinnaanissaa qulakkeerniarlugit.

Qilalukkanik qaortanik qernertanillu pisassisarneq qilalukkat ikiliartorneri unitsis-sinnaajumallugit atuutsilersinneqarpoq, kissaatigineqartutullu sunniuteqarsimavoq pisarineqartartummi ikilerujussuarmata. Pingaartumik unguisilluni piniartarnermut inerteq-quteqalernerneq uumasogatigiit amerlassutsimikkut aalajaannerulernerannut imaluunniit kigaatsumik amerliartoqqilernerannut pissutaanerpaanut ilaavoq. Uumassusilerituut inassuteqaasiaat aallaavigalugit pisassiissutissat APNN-imit ukiut tamaasa naleqqussarneqartarput, qilalugaqatigiiaat amerliartoqqinnissaat 70%-imik ilimanaa-serlugu. Qilalukkat qernertat amerliartornerat ilutigalugu siunissami ungasinnerusumi piniartut suli amerlanerusunik qernertanik qernertartalernissaminnut periarfissaqalis-sapput. Inassutigineqartut qaangerlugit pisaqartoqarneratigut immikkulluunniit pisassiinikkut pisassat sipporneqartarpata qilalukkanik qernertanik piniarneq piujuartitsinermik tunngaveqarluni ingerlatsinertut oqaatigineqarsinnaajunnaassaaq. Aalisarnermut, Piniarnermut Nunalerinermullu Naalakkersuisoqarfimmut ilisimatuus-sutsikkut inassuteqaatit tassaapput siunissami qaninnerusumi ungasinnerusumilu piujuartitsilluni ingerlatsinissamut nunanit tamalaanit aqutsiveqarnerit pillugit suliniaqatigiiffinit pitsaanerpaamik aamma arlaannaannulluunniit attuumassuteqanngin-nerpaamik siunnersuisarnerat.

NAMMCO marts 2017-imi arferit kigutillit, qilalukkat qaortat qernertallu nunarsuaq tamakkerlugu misissuiffigai - GROM-imik taallugu – tassanilu qilalukkat qaortaqaatigiiaat qernertaqaatigiiaallu piujuaannartinnissaannut killiffik eqqartorneqarluni. GROM-ip nunarsuaq tamakkerlugu qilalugaqatigiiaat qaortat 22-t kiisalu qilalugaqatigiiaat qernertat 12-it piuneri akuersaarpai, taakkulu qilalugaqatigiiaat nungutaa-sinnaanissaminnut aarlerinartorsiorneri aallaavigalugit inissititerneqartarput. Tassani "uumasoqatigiiaat nalilersuiffigineqarput", amerlassusaat, ilimagisat, pisat piujuartit-sinermik tunngaveqarluni pisarineqartarsimanerisa naatsorsorneri neriniartarfiinik aqutsinermut tunngatillugu isumakuluutit nalunaarsorneqarlutik.

Misissuinerit takutippaat qilalugaqatigiiaanit qaortanit 22-iusunit 1-2-it peerussimasut (1920-ikkunni Kalaallit Nunaata kitaata kujataani qilalukkat qaortat peerussimasut); qilalugaqatigiiaat qaortat 5-6-it nungutaanissaminnut aarlerinartorsioruujussuusut; qilalugaqatigiiaanit qaortanit 22-iusunit 9-t nungutaanissaminnut aarlerinartorsiorut kiisalu qilalugaqatigiiaanit qaortanit 6-it nungutaanissaminnut annikitsumik aarlerinartorsiorut. Misissuinerit inernerisa takutippaat qernertaqaatigiiaat marluk aarlerinartoruujussuarmik inissisimasut taakkulu tassaallutik Qimusseriarsuarmi Tunumilu

qernertat. Qernertaqatigiiaanit 12-iusunit 4-t aarlerinartorsiortutut nalilernerqarput qernertaqatigiiaallu sinneruttut 6-it annikitsumik aarlerinartorsiortutut nalunaarsorneqarsimallutik.

Misissuinerit takutippaat qilalukkat qaqortat qernertallu aarlerinartorsiortorujussuurtut inissisimalernerinut silaannaap allangornerata saniatigut piniarneqarpallaarnerat patsisaasoq, tassami qilalukkat qaqortaqtigiiit qernertaqatigiiaallu anginerit aasisarfimminni ukiisarfimminnilu killeqartumiipput piniarfigineqaratillu inunnit akornusersorneqarfinniingimmata. Qernertaqatigiiaanit 12-iusunit 6-it amerlasuutut nalilernerqarput naak piniarneqartarnerat annertugaluartoq. Tamatumani qernertaqatigiinnik aqutsilluarneq nakkutilluuarnerlu patsisaapput. Paarlattuanik qilalugaqtigiiat nungutaasimasut aarlerinartorsiortorujussuarniittulluunniit inissisimasut piffinni sippuilluni piniarfiusartuni piffinnilu inunnit akornusersuiffiusartuni, soorlu Kitaata kujataani qilalukkat qaqortaqtigiisimasut aamma qernertaqatigiit Qimusseriarsuarmi Tunumilu piusut.

*2. Kulturerput illersugassaraarput, sooruna Kullorsuup avannaani (qimusseriarsuarmi) immikkut qajamiit pisarineqartartut peerneqartut?*

Akissut 2)

Qaannat atorlugit qernertarniartarneq Naalakkersuisunit unitsinneqanngilaq. APNN-ip pisarineqarsimasut nalunaarsorneqarsimasut naapertorlugit ilisimalersimavaa umiat-siaaqqat angallatillu atorlugit pisassat pisarineqartarsimasut aalajangersakkat aqutsiveqarfimmi Upernavimmi malinneqaratik. Tamatuma kingunerisaanik Naalakkersuisut pisassiissutigisimasaasa iluini aqutsiveqarfimmi nammineq qaannat atorlugit pisassiisoqarnissaa aqutsiveqarfimmut APNN-imit ilisimatitsissutigineqarsimavoq. Qaannat atorlugit 14-inik immikkut qernertartassiinermut akissut 1-imi akissut takujuttaaq.

*3. Upernaviup eqqaani qilalukkat takkussimaartarnerat qaleralinniarnermut annertuumik akornutaasartoq ilisimaarineqarpoq, aalisartunut annertuumik aningaasarsionikkut innarliisarnerat Naalakkersuisut qanoq aaqiiffiginiarpaat?*

Akissut 3)

Ajornartorsiutip aaqiiffigineqarnissaanut Naalakkersuisut immikkut pilersaaruteqanngillat. Pisassiissutit tunniunneqarsimasut atorlugit kommunit ataasiakkaat pissutsinut taaneqartunut immikkut pisassiisarsinnaapput.

*4. Piniakkat killilersukkat amerlingaatsiarneranik takussutissiisoqartillugu, amerlanerusunik pisassiinissamut tunngavissiisoqartanngila ?*

Akissut 4)

Aqutsiveqarfimmi ataatsimi arlalinniluunniit peqassuseq annertuseriarsimatillugu uummassusilerituut innersuutaat tamanullu tusarniaareernerit kingorna ukiumut pisassat Naalakkersuisunit aalajangersarneqartarput.

Kane Basin-imi Baffin Bugtimilu nannut eqqarsaatigalugit 2018-imi taamatut inassuteqartoqarpoq. APNN Kane Basin-imi aammalu Baffin Bugten-imi nanoqassusermut 2016-imi missingiummut tunngaviumik uummassusilerituut innersuutaanik kiisalu 2017-imi piniarnermi aarlerinarsinnaasut pillugit misissueqqissaarnermit nalunaarusiamik tigusaqarpoq. Ukiup tulliani 2018-imi uummassusilerituut siunnersuutaat kingulleq naapertorlugu piffimmi pineqartumi nannuttassat amerlineqarput. – Kane Basin-imi aamma Baffin Bugt-imi 2018-imi

nannuttassat agguarneqarnerat amerlineqarnerallu pillugit tusagassiutinut nalunaarut ilanngullugu nassiunneqarpoq.

Qilalukkat qaqortat qernertallu amerlineqarnissaanik uumassusilerituut innersuuteqartillugit taamatutaaq inassuteqartoqassaaq.

Kalaallit Nunaanni qilalukkat qaqortat qernertallu ataasiakkaat inissisimanerat pillugu akissutigat takujuk.

Uumassusilerituut ikililerinissamik amerliliinissamilluunniit siunnersuutaat mianersornissaq tunngavigalugu Naalakkersuisunit aallaaviatigut malinneqakkajutarput.

*5. Ittoqqortoormiini april aallartiinnartoq nannuttassaaruttarneq Naalakkersuisut qanoq isumaqarfigaat?*

Akissut 5)

Ittoqqortoormiini nannuttassat ukiup affaata siulliup ingerlanerani tamakkerlugit pisinneqareertarnerinut patsisit assigiinngitsut arlaliupput. Pissutsit taamaannerat APNN-imit ajortutut isigineqanngilaq, pissutsillu taamaannerinut patsisaasut tullinnguut-tumi nassuiarneqarput.

Ittoqqortoormiini nannut oktoberip aallaqqaataaniit julip 31-iata tungaanut piniagaasarput. Qaammatit sinnerini nannut eqqissisimatinneqartarput nannunut inersimasut eqqissisimaartinneqarnissaannut piaraasalu allisarnissaanut pingaaruteqaqisumik. Piniagaannginnerisa nalaanni kinguninnguanilu oqaluttuarisaaneq aallaavigalugu Ittoqqortoormiit illoqarfiata eqqaa nanoqarpiarneq ajorpoq.

Taamaattumik ukiuunerani nannunniartoqartarnissaa aammalu pisassat killilersugaanerit eqqarsaatigalugu pissusissamisoornerpaasutut isigineqarpoq.

Piniartut pisassa qarunik ukiup naajartulernerani soorlu decembarimi nannuttarsinnaanerit ilimanaateqarsinnaavoq. Taamaattorli APNN isumaqarpoq piniartut aqutsisullu akornanni suleqatigiinneq pitsaasumik ingerlasoq aammalu pisassat ukiup aallartinnerani atorineqartarnerat ajunngitsuusoq. Piniartut ilisimasaasa atorineqartarnissaat aammalu atuisutut misilittagaasa naalaarneqarlutillu atorineqartarnissaat Aalisarnermut, Piniarnermut Nunalerinermullu Naalakkersuisoqarfimmit pingaartinneqarpoq.

Kalaallit Nunaanni tamarmi inuussutissarsiutigalugu piniartuunerusunik suleqateqarneq piffissamik nukinnillu atuiffiusimapput. Ittoqqortoormiit kingullermik februar 2020-mi APNN-imit tikeraarneqarput. Tassani pisinneqartartut pissutsit allanngoriartorneri aammalu qilalugaanerusut nannunullu tunnganerutillugu piniagassanik takunnittarsimanerit oqaloqatigiissutigineqarput. Aqutsinissamut tunngatillugu suliniutit killilersuinerillu Naalakkersuisunit ingerlanneqartut piniartunut soqutigineqarluarlutillu paasiluarneqarput. Taamaattorli piniartut isumaqarput naatsorsuutigisamit nanoqarnerusoq taamaattumillu pisassat amerlineqarsinnaasut. Taamaattumik Tunumi nannuttassat pillugit uumassusilerituut siunnersuutissaat pissangallunga utaqqivakka.


Tunumi pisassat mianersornissamik aallaaveqarluni amerlassusilerneqarsimapput uumasooqatigiinnummi taakkununga pisassat uumassusilerituunit suli siunnersuuteqarfigineqarnikuunngimmata. Suliassaq pineqartoq suliarineqaleruttorpoq, ukioq mannali COVID-19 pissutigalugu kinguartinneqartariaqarsimalluni, taamaattumillu siunnersuinivik aatsaat siusinnerpaamik 2023-mi pisinnaassalluni. Pisassanut

aalajangersarneqarsimasunut ilassutitut aammalu mianersornissaq aallaavigalugu Tunumi immikkut katillugit 10-nik nannuttassiisoqarnikuuvoq. Kommuniq piniartullu amerlilinissamik kissaataat naammassisinnaajumallugit Ittoqqortoormiunut Tasiilamullu tunngatillugu tamarmik immikkut 5-inik pisassinneqaqqinnissaanik naalakkersuinikkut aalajangiisoqarsimavoq 2011-miilli.

Piniartunik pitsaasumik suleqateqarnerup pilersinneqarlunilu attanneqarnissaata sania-tigut piniakkat piujuartitsinermik aallaaveqarluni piniarneqartarnissaat taamaasillunilu piniagassat kinguaassatsinnit piniarneqartarnissaat qulakkeerniarlugu aqutsinermi uumassusilerituunit siunnersuutigineqartut ilanngullugit suliarineqartarnissat Naalakker-suisut suliassaraat.

Nannut amerlasuujuarnissaat piujuartitsinermillu aallaaveqarluni piniarneqartarnissaat qulakkeerniarlugu susassaqartut takusartagaasa aqutsinermilu misilittagaasa naliler-suinermi ilanngunneqartarnissaat Naalakkersuisut suliassaraat. Tamanna ullumikkut periusigineqarlutillu pisasseeriaaserineqartut naapertorlugit qulakkeerneqassaaq, tas-sanilu allannguutaajunnartut uumassusilerituut innersuutaat nutaat siusinnerpaamik 2023-imi tiguneqarpata aatsaat pisinnaassapput. Pissutsit taamaannerat Tunumi piniartut ilisimavaat. Takuneqarsinnaasutut aallaaviatigut isumaqartoqarpoq piniartut ilisimasaat aammalu uumassusilerituut siunnersuisarneri eqqarsaatigalugit eqqortumik aqutsisoqartoq, taamaasiornikkummi pitsaanermik atuinissaq illersuinissarlu qulakkeerneqarsinnaammat.

Inussiarnersumik inuulluaqqusillunga



Jens Immanuelson

Aalisarnermut, Piniarnermut Nunalerinermullu Naalakkersuisoq



## Tusagassiorfinnut nalunaarut Pressemeddelelse

### 2018-imi nannutassiissutit

Nannutassiissutissat Aalisarnermut Piniarnermullu Naalakkersuisumit akuerineqarput. Nannutassiissutissat uumassusilerinikkut siunnersuineq, tusarniaanermik naalakkersuinikkullu aalajangiinerit aallaavigalugit agguanneqarput. Agguaassinerit ima isikkoqarput:

#### Takussutissiaq 1: 1-1-2018-imiit nannutassiissutit

Nanoqatigiit	2017	2018
Kane-p Imartornga (Qaanaaq, Savissivik ilanngunnagu)	6	9
Baffinip Ikera (Savissivik - Kangaatsiaq)	67	80
Davis Strædi (Paamiut – Sisimiut)	3	3
<b>Avannaa Kitaalu katillugit:</b>	<b>76</b>	<b>92</b>
Kangia Kujataalu (Kalaallit Nunaata Kangia, Narsaq, Qaqortoq aamma Nanortalik)	64	64
<b>Katillugit</b>	<b>140</b>	<b>156</b>

19-12-2017  
Suliap nr: 2017 - 5551  
All nr: 6839800

Postboks 269  
3900 Nuuk  
Oqarasuaat (+299) 34  
50 00  
Fax (+299) 34 63 55  
E-mail: apn@nanoq.gl  
www.naalakkersuisut.gl

#### Takussutissiaq 2: Pisassat aqutsiveqarfinnut agguarneqarneri ima isikkoqarput:

Kane-p Imartornga	Pisassiissutit	Nunatta Kangia	Pisassiissutit
Siorapaluk	9	Ittoqqortoormiit	35
Qaanaaq		Tasiilaq	25
Qeqertat		Nanortalik	4
Moriusaq		Qaqortoq	
		Narsaq	

Baffin-ip Ikera	Pisassiissutit
Savissivik (+ Qaanaaq)	24*
Upernavik	44
Uummannaq	12
Qeqertarsuaq	
Ilulissat	
Qasigiannugit	
Aasiaat	
Kangaatsiaq	

Ikersuaq Davis	Pisassiissutit
Sisimiut	3
Maniitsoq	
Nuuk	
Paamiut	

\*Pisassanit taakkuanga 4 -t Qaanaap eqqaani piniartunut immikkoortinneqarput – taamaasillutillu akuersissutit taakku sisamaasut Savissivimmi piniartunut tunniunneqarsinnaantik.

Kalaallit Nunaata Kitaani tassalu Baffin-ip Ikerani Kane-p Imartonganilu nannuttassiissutit ilisimatuussutsikkut siunnersuinerit nutaat kiisalu Kalaallit Nunaata, Canadap Nunavullu akornanni Ataatsimoorussamik kommissionimi nannut pillugit ataatsimiittoqareernerata kingorna allangortinneqarput. Suliat ilisimatuut aqutsisullu nunatsinneersut canadameersullu ukiorpassuarni ataatsimoorlutik suliaqartarsimaneridik tunngaveqarput (allaatigeqqissaarnera ilangussaq 1-imi takujuk).

Aqutsiveqarfinni Kalaallit Nunaata Kangiani, Ikersuaq Davis-imilu nannuttassiissutit ukiup siulianut sanilliullugit allanguuteqanngillat. APN pineqartunut tunngatillugu siunnersuutidik nutaamik tigusaqarnikuunngilaq.

Baffin-ip Ikerani Kane-p Imartonganilu nannuttassiissutit amerleriaataat piffinnut ileqqutoqqat malillugit nannunniarnermik ingerlataqareersunut tunniunneqarnissaat naalakkersuinikkut aalajangerneqarpoq.

Tamanna tunngavigalugu Baffin-ip Ikerani pisassiissutit amerleriaataat (nannut sisamat) piniartunut Qaanaameersunut illikartinneqarput, Savissiviup eqqaanut nannuniarnissamat kissaateqartunut. Qaanaami piniartunut erseqqissaatigineqassaaq nannuttassiissutit sisamat amerleriaatit Savissiviup eqqaani kisimi pisarineqassammata.

Qaanaami piniartut Kane-p Imartogani annerpaamik nannut qulingiluat pisarisinnaavaat.

Akiliisitsilluni nannunniartitsisoqarsinnaanngilaq.

2018-imi nannuttassiissutit atunngitsuukkat 2019-imut ingerlaqqissapput (carry-over), taamatut nuussinermi ukiumiit ukiumut amerliartortitsinngitsoq atorneqassaaq, nanoqatiigiit kommunillu iluanni.

*Annertunerusumik paasisaqartoqarusukkuni Aalisarnermut Piniarnermullu*

*Naalakkersuisoqarfimmi immikkoortortaqarfimmi pisortaq Amalie Jessen tlf 34 53 04 imaluunniit*

*e-mail amaile@nanoq.gl aqqutigalugit attavigineqarsinnaavoq*

*Departementet for Fiskeri og Fangst, tlf: 34 53 04, e-mail: amalie@nanoq.gl*

Ilanngussaq 1: Ilisimatuussutsikkut angusat kiisalu nannut pillugit Ataatsimoorussamik kommissionimi sulineq pillugit tunuliaqtitut paasissutissat.

**Ilanngussaq 1-** Ilisimatuussutsikkut angusat kiisalu nannut pillugit Ataatsimoorussamik kommissionimi sulineq pillugit tunuliaqtitut paasissutissat.

SWG-ip (Avannaata Imaani Ikersuarmilu nannut ataatsimoorussat amerlassusaat pillugit Kalaallit Nunaata, Canadap Nunavullu akornanni Kommissionip ataani ilisimatuussutsikkut suleqatigiissitaq) nalunaarusiaa siulleg Kalaallit Nunaannit 2016-imi julimi tiguneqarpoq.

- 2012-2013-imi Ikersuarmi annertussutsinik missiliuineq nannunut **2,826**-inut naatsorsorneqarpoq (95 % CI<sup>1</sup> = 2,059-3,593) .
- 2013-2014-imi Kane Basinimi missiliuineq nannunut **357**-inut missiliorneqarpoq (95 % CI = 221-493).

Piniarnermi aarlerinaataasinnaasut pillugit misissueqqissaarnermi nalunaarusiaq kingulleq tunngaviusussarlu 2017-imi julimi tiguneqarpoq. Nalunaarusiami maannakkut pisarineqartartut amerlassusii sillimaffigineqarput silallu pissusaata allanngornerata (immap sikuata/uumaffigineqartup annikillinera) pingaaruteqarnera ilanngunneqarluni. Nalunaarusiami tassani kaammattuutigineqartut Kalaallit Nunaata, Canadap Nunavullu akornanni Ataatsimoorussamik Kommissionip oktober 2017-imi Avannaata Imaani Ikersuarmilu nannut ataatsimoorussat agguaassilluni ataatsimiinnerani tunngavigineqarput.

Ataatsimut kommissioni (JCPB) ataatsimiinnermi tassani Ikersuarmi nannuttassiissutigineqartussat pillugit isumaqatigiissuteqarsinnaasimavoq, tassani aalajangerneqarluni:

- 1) Piniarnissamut periarfissaq 2 atorneqassaaq: *Avatangiisitigut nammanneqarsinnaasuni allanngortoqarsinnaanera sillimaffigalugu piujuartitsinissaq tunngavigalugu annertunerpaamik atorluaanissaq anguniarlugu nannut amerlassusaat piniarsinnaallugit.*
- 2) Anguniakkap anguneqanngitsoorsinnaaneranik ilimanassuseq "akunnattoq" akuerineqarpoq,
- 3) Tassani amerlassutsitut naatsorsorneqartut 5,7%-ii piniagassatut amerlanerpaaffiliullugit, ukiumullu nannut piniarsinnaasat tamarmiusut 160-ullutik.
- 4) Piniagassiissutit agguarneranni Nunavut Kalaallit Nunaatalu Kitaata akornanni agguaariaaseq 50/50 tunngavigineqarpoq.

Naak Kalaallit Nunaannit Nunavummillu siunnersuutit assigiinngitsut pillugit eqqartueqatigiittoqaraluartoq, Ikersuarmi pisassat agguaanneqarnissaat pillugu isumaqatigiittoqanngilaq. Susassaqtulli tamarmik ilisimatuussutsikkut siunnersuutit malinneqarnissaat kissaatigaat.

---

<sup>1</sup> CI: Tatiginartuunera isumaqarpoq uuttuutip kisitsisit akornanniinnerisa ilimanaateqarnera.